

Finf Stern' *****–Speis

Boid noch'n Kria bi i kemma auf d'Wöt,
vü hob'm ma net g'hobt dahoam, a kam a Göd.
's wor net leicht fir meene Ötan, net leicht a fir mi,
owa oa's homma g'hobt, und 's wor wichti find' i:
Des wor d'Speis! Durt drin' wor oiweu wos zum Ess'n,
guide Sochan! I hob's bis heet net vogess'n.

Bei uns hot's oiweu a poor Viecha g'geb'm,
de hob'm auf'fett'n't unsa bescheidenes Leb'm.
Fir Fleisch und Schmoiz homma g'fiadat a Sau,
und fir d'Müli a Goaß, des woaß i no g'nau.

Ant'n und Gäns' wor'n bestimmt fir b'sundare Täg',
wia gern i so a Biagal nomoi onog'n tät.
D'Hea wor'n oanaseits wichti fir d'Oa,
ois Oide wor'n's Supp'nhenna donn gor.

Beim Sauostecha wor unsa Speis donn dro.
Durt kimmt ois hi, wos ma aus da Sau mocha ko:
's meiste Fleisch kimmt in Fleischschrauf eene
nur söt'n kimmt'wos auße, kloaweis und weni!

Speckzankaln und Grammöln, a Desd'n Schmoiz,
auf d'Lewapastet'n woa d'Muida gonz stoiz!
G'söcht's und Blunz'n, schee kranz'lweis,
hängan auf da Stonga – quer iwa d'Speis.
Daneb'm hängt a Goaßwurscht, de muiß i lob'm.
Daglängt hob i's net, sie wor ma z'hoch ob'm.

Fest hot d'Speis g'stunga, hot da Krautstonda g'gärt,
owa im Winta wor 's Kraut donn oiseits begehrt.
's Finflitaglos'l Soizgurk'n steht om Bod'n in an Eck.
Essigurkal, G'mischta Solot im Regeu auf an Fleck.
A Stimpfö Fiso'in steht auf da Erd' – und
Knofö und Zwiefö – schmeckan, san g'sund.

Visavi glonz'n – ausg'richt't kirz'ngrod –
Marü'n-und Birn- und Kersch'nkompott.
Daneb'm Powidl und Marü'nmam'lad',
wia gern i do glei a weng schlecka tat'.
Eeg'rexn't vo d'Paradeiser de siaße Soß'.
A Rumtopf steht a do – i woaß no net fir wos.

Gonz ob'm bei Plafo und net zum Daglenga,
d' Krapfaldos'n. – Fir wos? Muiss i ma do denga:
Schmersstru'l, Schniakropfa fir'n Weihnochtstermin
und vorschiedanstees Krapfal de wor'n do drin.
Om Süvesta hob'm d'Dosna scho 'klunga recht hoih,
und i hob' net g'wisst, wo i in Rest hiess'n soi.

Und heet? Wos is heet drin in da Speis?
A Küh-, a G'frierschronk und Plastikg'schirr,
Sack'In groß und kloa, Plastik und Popier
„Rex-Glas'In" mit Gummiringal porös scho ois wia,
de Krapfaldos'n san a nur mehr Nostalgie
owa Grüb'steck und Becha (da Grümoasta bi i).

Krautstonda und Fleischschrauf somt G'wind
wegg'ramt, om Dochbo'n auffeg'haut g'schwind.
Durt steht a da Krauthowö, d'Schneidblaln vorost't,
vom Rumtopf d'Scherb'm, da Deckl no gonz – fost!

Wos bleibt vo da Finf Stern'–Speis mir oid'n Mo?
Nur des, dass i mi grod' no erinnan ko.
Liabe Leit'! Wonn i **oamoi** no eerama kunnt'
mee Finf Stern'–Speis, vo ob'm bis unt'?
Schmecka tat' i und kost'n, g'rod' wia friha so,
vo ob'm bis unt', vo voro bis hint' in gonz'n To

15.07.2026

Originaltext:

I bin a poar Joahr noch'n zweitn Wödkria auf d' Wöd kemma und waun i so zruck denk - aun mei Kindheit, soweit ma oane ghobt haum, muis i sogn, mir haum oiwäu wos in da Speis zum Essen ghobt. Mia haum söwa Sau und Goas gfiadad Hendl, Antn und Gäns woarn a do. Nochn Sau schlachtn is in da Speis da Fleischschrauf drin gstaundn, a Desen Schmoiz und Grammön, etliche Zankaln Speck, a poar Glasl Lewapastetn, und a eidosiert's Fleisch – meistnss a Gsöchts. Blunznkranzl san aufgehängt wesn, eventö a Goaswurscht zum trickan. Und da Krautstaunda. Waun der gärt hot, do hots gstunga Der hot wos hergebm,	Keaschnkompott, Marünkompott und Birnompott in san da Heh auf da aundan Seitn gstaundn. Marünmamelad und Powidl glei danebn. Rumtopf und de eengrexe Paradeissoss drunta. A Stimpfö Fisoln, a Kistl Knofö und a Kistl Zwiefö auf da Erd. Erdöpfön san im Kölla gwesen. Vor Weihnachtn woarn no de volln Krapfaldosn, a Schmerstrudl und Schniakropfa drin. De haum se sowiso net laung goidn. De san Ois erschtas zaumgessn woarn. Wos is heit drin — Kühl — und Gfirrschränk, Plastikg'schirr und Plastiksackerl — in Olle Grössn, Mineralwossa — wäu
---	---

Mehrere Glasln gmischn Solod, eeiglegte Essiggurkal, Soizgurkn im Fünflitaglasl - auf da Erd.	des Wossa vom Hausbrunn is net gsund, (Joahrzehntelong homas owa drunga), „Grillbesteck und Tassen", verstaubte „Rex —Glasln"
mit ausahte Gummiringerl und Kiazn fian Friedhof. De Krapfaldosn in da Speis san nur mehr Zierde. A zlexnda Krautstaunda mid'n desolatn Fleischschrauf saumt seen Gwind liegt aum Dochbodn und da Krauthowe mit de rostign Schneidblattl glei danebn.	Da Deckl vom Rumtopf is no do, söbige Topf gibt's nur mehr in Scherbm. Wenigstens de Erinnerung hob i dahoidn. Trotz Oim mecht i wieda amoi a „Fünf Stern – Speis" haum.